

ԲԱՆԱՎԵՃԵՐ ԵՎ ՔՆՆԱՐԿՈՒՄՆԵՐ ДИСКУССИИ И ОБСУЖДЕНИЯ

ԳԻՏՈՂՈՒԹՅՈՒՆՆԵՐ ԴԱՎԻԹ ԲԵԿԻ ԱՊՍԱՄԲՈՒԹՅԱՆ ՊԱՏՄՈՒԹՅԱՆ ՇՈՒՐՋԸ

Ա. Գ. ՄԱԴՈՅԱՆ

Դավիթ Բեկի գլխավորած հերոսական ապստամբության վերաբերյալ մեր դիտելիքները հիմնված են գլխավորապես Ղուկաս Սեբաստացու շարադրած «Պատմություն Դավիթ պէկին» աշխատության վրա, որը հայտնի է երկու՝ ընդարձակ և համառոտ խմբագրությամբ¹, ըստ որում, համառոտը բավական ուշ է հայտնի դարձել հայագիտությանը²։ Պատմությունը Լեոյի գնահատությամբ «XVIII դարի ամենագեղեցիկ գրական գործերից մեկն է»³։ Նույնը չի կարելի ասել նրա պատմական արժեքի մասին։ Ճիշտ են նկատել, որ սույն աշխատությունը անբավարար պատկերացում է տալիս ընթերցողին XVIII դ. սկզբի հայ ազատագրական շարժումների մասին։ Դրա պատճառներից մեկն ըստ երևույթին այն է, որ պատմությունը շարադրող Ղուկաս Սեբաստացուն ապստամբության մասին պատմողներն իրենք՝ Ստեփանոս Շահումյանը, Տեր-Ավետիսը և մյուսները, լինելով ռազմական այս կամ այն գործողության ականատես-մասնակից, հստակորեն չէին պատկերացնում կամ հիշում մյուս հատվածներում տեղի ունեցած իրադարձությունները։ Նկատված է, որ այսօրվա իր վիճակով «Պատմությունն» ունի մի շարք կասկածելի ու սրբագրելի տեղեր։ Կասկածելի է թվականների մեծ մասը։ Բնագրի սխալ կամ վստահելի տեղերը մատնանշելիս պետք է հանդես բերել զգուշավոր քննական մոտեցում։ Հետաքրքիր է, օրինակ, որ Լեոն, չնայած տեղյակ էր այս հանգամանքին, լավ ուսումնասիրել էր ապստամբությանը վերաբերող նյութերը, նույնիսկ պատմավեպ էր գրել Մխիթար սպարապետի մասին, մեջբերելով վերջինիս տապանագիրը, ուր ասված է՝ «Նահատակեցաւ ՌՃՀԶ (1727) թվականին», վստահում է «Պատմությանը» և ծանոթագրում. «Թվականը սխալ է, պիտի լինի ՌՃՀԹ (1730)»⁴։

Դավիթ Բեկի ապստամբությունը շատ նշանակալից երևույթ էր հայ կյանքում, ուստի բնական էր սպասել ավելի լայն արձագանք։ Սերունդներն, իրոք, անդրադարձել են դրան, աշխատել դրի առնել ու փրկել մոռացությունից ապրստամբության մասնակիցների հուշերը։ Ուսումնասիրողները, սակայն, պատմության պակասը աշխատել են լրացնել գլխավորապես բանավոր ավանդություններին դիմելով, երբեմն չափից ավելի վստահություն տածելով դրանց նկատմամբ։

Կ. վ. Շահնաղարյանցը Ստեփանոս Օրբելյանի «Պատմությանը» կցած առաջաբանում, որ վերնագրել է «Սիրնիք», ասում է, թե ինքը 1840-ական թթ.

¹ «Պատմություն Դավիթ պէկին» և «Պատմություն խափանցող»։

² Տե՛ս «Բազմավեպ», 1938, թ. 6—9, էջ 172—187։

³ Լեոն, Հայոց պատմություն, Գ հատ., Երևան, 1946, էջ 1023։

⁴ Նույն տեղում, էջ 698։

սկզբին լինելով Սյունիքի առաջնորդ, գրել է այդ նահանգի մասին մի սովոր աշխատություն, ուր արժեքավոր տեղեկություններ են եղել Դավիթ բեկի ղեկավարած շարժումների մասին: «Ո՛ր հայ է որոյ ոչ իցէ լուեալ զգովանի գործս հայրենասիրութեան Դաւիթ բեկի Սիւնեցոյ, որոյ վառեալ նուիրական սիրով աւատութեան աղգին՝ փորձ փորձեաց ի սկզբան ութ և տասներորդ գարուն առ ի ազատել աջակցութեամբ քաջաց ոմանց գերկիր մեր յօտար լծոյ,— գրում է Գ. Շահնազարյանցը ու ավելացնում.— Սիրէի նստել բազում անգամ ընդ հովաննաւ ւալեոր Էփենեայ Պեխ գեղջ և լսել զվէպս հարիւրամեայ Ստեփաննոս աւագ քահանային՝ թոռին գովելոյն Պալայ՝ միոյ յընկերացն Դաւթի: Առի ի նմանէ նաև զստոյգ պատմութիւն քաջագործութեանց Դաւթի և եղի ի մատենադարանի սրբոյ էջմիածնի ընդ ձեռն Շահխաթունեան Յովհաննէս Լալիսկոպոսի»⁵:

Կ. Շահնազարյանցի «շորերամեայ երկանց պտուղը» կորել է: «Երկս այս,— շարունակում է նա,— որ (եթէ մոռնալ էր ի տիպ) կարէր սփռել լոյս մեծ ի վերայ նահանգին Սիւնեաց ըստ բազում զխոց, եւ ուղղել զվրիպակս բազմաց ի մատենագրաց՝ ողորմելի իմն հանդիպեցաւ օրհասի»⁶:

Ն. Ազոնցը, Ե. Փեշիկչյանը և ուրիշներ ամփոսանքով են հիշել այս փաստը⁷: Հավանաբար կա՛մ Շահխաթունյանցի թղթերում, կա՛մ այլևայլ տեղերում մնացած կլինեն ինչ-որ հետքեր այդ աշխատությունից, որը կարևոր տեղեկություններ պիտի պարունակեր և ամփոսամբության մասին:

Այդպիսի տեղեկություններ մենք գտնում ենք նույն հեղինակի «Ծրագիր պատմություն Հայաստան աշխարհին և տեսություն Հին Հայաստանի և նրա այժմյան վիճակին վրա» աշխատության մեջ: Դրանք, հավանաբար, հակիրճ վերարտադրությունն են կորած պատմության համապատասխան հատվածի:

Բերենք «Ծրագիր պատմության» մեզ հետաքրքրող հատվածը. «Ղարապաղն իմանալով Պետրոս Առաքինի գալը դեպի Տերբենդ, անկախության դրոշակը բաց արավ. 60000 մարդ զենք առավ ձեռին: Դավիթ Սյունյաց իշխանը, որ մեծ զինվորական հանճարով և հայրենյաց համար գլուխը դնող մարդ էր, վրաց թագավոր Գեորգ կամ Շահ Նավազի հետ վերջին գործողությանց հիմունքը որոշելուց հետո, 1721 թվին Տփլիսից դուրս եկավ 40000 մարդով և զնաց Սյունյաց գավառը զրավեց և թշնամին այլևայլ տեղեր հաղթվելով, մի մասամբ չնջվեցավ, մի մասամբ էլ դուրս քշվեցավ: Սյունյաց նահանգն առ ժամանակ օտարներու լուծիցը ազատվեցավ: Երբ Դավիթ Սյունյաց երկրումն էր պատերազմ տալի թշնամվույն, իր երկու զորապետները, Ավան-խան Միրզա և Ավան յուզպաշի ուրիշ երկու բաժին զորքով Ղարապաղը պաշտպանում էին... Դավիթ իշխանը, Աճանան, Կասյան, Չավնտուր, Բաղաբերդ, Քյունեյի և Մեղրի զավառներին տիրելուց հետո, որ իր գլխավոր տեղն էր, նախիջևանի խանին դեմ մի ճակատամարտում հաղթվեցավ... Սարը Մուստաֆա փաշան անհամար թյուրք-մեններով, քրդերով և թաթարներով կազմած մի բանակի ղուխն անց կացած Սյունյաց երկիրը մտավ և զնաց Հալիձորի առջև բանակը դրավ, որնոր առ ժամանակյա կառավարության տեղին էր: Դավիթ մի հաջողակ ձեռնարկությամբ, ստիպեցրուց նրան բանակը վերցնել և դաշտին վրա նրան հետ կովելով հաղ-

⁵ «Պատմութիւն նահանգին Սիսական արարեալ Ստեփաննոսի Օրբէլեան արքեպիսկոպոսի Սիւնեաց», ի լոյս բնծայեաց հանդերձ ծանոթութեամբ Կարապետ վ. Շահնազարեանց՝ միարան սրբոյ էջմիածնի, հատ. Ա, Փարիզ, 1859, էջ 7—8:

⁶ Նույն տեղում:

⁷ Տե՛ս, օրինակ, «Բազմավույս», 1938, թ. 6—9, էջ 179:

թեց»⁸։ Այստեղ, ըստ երևույթին հիշողությամբ գրելու պատճառով, Կ. Շահնազարյանցը թույլ է տվել որոշ շփոթություն։ Սակայն ուշադրության արժանի հանգամանքներ ևս կան։ Դրանցից առաջինը ապստամբության սկսվելու ժամանակն է, որ համարվում է 1722 թ. աշունը։ Սույն քաղվածքի մեջ նշվում է 1721 թ.։ Վրիպա՛կ է դա։ Չէ՞ որ մինչ այդ խոսվում է Պետրոս Առաջինի կողմից Դերբենդի գրավվելու մասին, որ տեղի է ունեցել ավելի ուշ։ Բայց այլ վկայություններ էլ կան, որ թույլ են տալիս կասկածի ենթարկելու ընդունված թվականը։

«1720 թվականին՝ ի վերջ աշնան... Տրապիզոնի նավով եկին Թեոդոսիա հայ վաճառականք,—մեզ անհայտ աղբյուրի հիման վրա գրում է Գ. Պատկանյանը,— և համբավ բերին, որ ղարաբաղցի (Սյունյաց և Արցախաց երկրացի) հայերն՝ վրաց թագավորութենեն հրավիրել են յուրյանց հայրենակից մի քաջ անձն՝ ղարաբաղցի Դավիթ Սյունի (Դավիթ բեկ կոչյալ) վրաց զորաց սպարապետն, որ գա յուրյանց ղորագլուխ դառնա և առաջնորդե, որ գուցե թե այնու փոքր ինչ հանգիստ դտանեն։ Ղարաբաղցվոց կողմեն ուղարկված ղեսպանն եղել է Ստեփանոս անուն մի ազգապետ, վասնորո անունն մնացել է նշի Ստեփան»⁹։

Մխիթար աբեղան XVI դ. մի ավետարանի մեջ լիմ անապատում տեղի ունեցած ժողովի մասին 1722 թ. կատարել է հետևյալ գրառումը. «Քաջահամբաւ և արիասիրտ վարդապետ մի՝ յերկրէն Ռշտունեաց տէր ներսէս անուանեալ, յոյժ յուզեալ և լալազին պատկերացոյց դառնակսկիծ վիճակս համօրէն ազգիս և յայտնեաց ցնծազին՝ թէ այր մի երկրէն Սիւնեաց Դաւիթ բէկ անուանեալ, զօրաշարժութիւն արարեալ իցէ վասն հալածելոյ նեղիչք և կշտամբիչք մեր, սիսու ունենալով ազատագրելու արիւնածուփ զաշխարհն Հայաստան։ Արդ, ո՛վ բարեմիտ և հայրենապաշտ ժողովականք, շրջեսցէք դաւաոս և կողմանս յերկրին ձերոյ խրախուսեսցէք ժողովուրդք ձեր, որ մրափեալ է ի խոր խաւարի և տանջանաց, զի թոթափեսցեն զլուծ անիրաւաց բռնութեանցս, և յորժամ մեք առաքեսցուք զհրաւէր մարտի, բառնան ձայն ապստամբութեան ընդդէմ մարդակեր և խաշահալած թշնամեաղ մերոց»¹⁰։ Այս հիշատակարանը կասկածելի է համարել պրոֆ. Ա. Աբրահամյանը, պատճառաբանելով, թե Դավիթ բեկը «Սյունիք է եկել միայն 1722 թ. վերջերին և ազատագրական լայն աշխատանք ծավալել հաջորդ՝ 1723 թ., ուստի և չէր կարող Դավիթ բեկի գործունեության, նրա «զորաշարժի» արձագանքը, այն էլ վասպուրականում, լինել 1722 թվին»¹¹։ Այս փաստերն, անշուշտ, անբավարար են սրբագրելու համար խնդրո առարկա թվականը, բայց թույլ են տալիս կասկածանքով մոտենալու հարցին։

Կ. Շահնազարյանցը մատնանշում է Դավիթ բեկի և Մխիթար սպարապետի մահվան՝ «Պատմութիւն Դաւիթ պէկին» բնագրից տարբեր թվական։ «Դավթի մեռնելուց հետո 1727 թվին Մխիթարն, իր ընտիր զորապետներից միներ, իրա տեղն անցկացաւ և իր հայրենիքը պաշտպանեց մինչև 1727 թիվն, երբ մի քանի դավաճաններու ձեռքով սպանվեցավ և որոնք նորունց օտարին հանձ-

8 «Կոունկ Հայոց աշխարհին», Դ տարի (1863), Թ. Ը, էջ 620—622։

9 Տե՛ս «Բանբեր Հայաստանի արխիվների», 1972, N 3, էջ 147։

10 ՀՍՍՀ ԳԱ «Տեղեկագիր» (հաս. գիտ.), 1941, N 5—6, էջ 71—72։ Ընդգծվածը գրված է կարճրագրով։

11 Ա. Աբրահամյան, Մի էջ Անդրկովկասի ժողովուրդների և հայ-ոսմական հարաբերությունների պատմությունից, Երևան, 1953, էջ 79։

նեցին իրանց հայրենիքը, որնոր տակավին հայոց թափած արյունովն էր ոռոգված անկախության համար»¹²։ Այստեղ երկրորդ 1727-ը հավանաբար վրիպակ է և պետք է սրբագրել՝ 1728, հակառակ դեպքում փոքր-ինչ անիմաստ է ստացվում. Մխիթարը 1727 թ. հայրենիքը պաշտպանեց մինչև 1727 թ.։ Ինչևէ, կարևորն այն է, որ Կ. Շահնազարյանցի նշած թվականներն ավելի մոտ են իրականությանը, քան Ղուկաս Սեբաստացու բնագրի թվականները։

Դավիթ բեկի վերաբերյալ որոշ տվյալներ գտնում ենք Հովհաննես Մելիք-Սեփմյանցի աշխատության մեջ, որը գրված է գլխավորապես Մ. Զամչյանի «Պատմության» հետևողությամբ (դա երևում է և աշխատության վերնագրից)։ Հովհ. Մելիք-Սեփմյանցի մյուս աղբյուրները մեզ տնօրենի են։ Դավիթ բեկի հոր՝ Աստվածատուր-Ալլահվերտիի մասին նրա հաղորդած տեղեկություններն, Երինակ, որքան էլ կարոտ լինեն ստուգման, հետաքրքիր են ինքնին և արժանի ուշադրության¹³։

Մ. Զամչյանը և իր հետևորդները (Հ. Մելիք-Սեփմյանց, Մ. Մաղաթ-Թեոփիլյան և ուրիշներ) պատմում են մի դեպք, որ վերաբերում է Դավթի ռազմական հնարամտությանը։ Անտարակույս, Մ. Զամչյանը ձեռքի տակ ունեցել է այդ մասին ավանդող աղբյուր, որից օգտվել է։ Դա կարող էր լինել նաև Դավթ բեկի պատմությունը, որ այժմ չունի մատակ ձեռքի հետ կապված հետևյալ դեպքի նկարագրությունը. «Փութացան այլազգիք և առաել բազմութեամբ եկեալ պաշարեցին զՀալիձոր։ Եւ յայնժամ Դավթ ձեռն էարկ ի նոր հնարս աղատելոյ ի նոցանէ։ Ունէր առ իւր զվաթսուն մատակ երիվարս. և զի գիտէր լէ այլազգեացն իին առհասարակ որձք մատակախաղք, արծակեաց զմատակս իւր ի բանակ սոցա. և ի խառնիլ ձիոցն, անկաւ շփոթութիւն մեծ յայլաղիս. և յայնմ պահու յարծակեալ ի վերայ նոցա Դավթի, ցիրեցան արար զնոսա, և բազում աւարաւ եմուտ յամրոցն»¹⁴։

Նման մի շարք մանրամասներ ու նկարագրություններ կան Գ. Շերմաղանյանի «Ճանապարհորդություն Հայաստանումը» շատ բանով հետաքրքրողական ուղեգրության մեջ, որ նախ տպագրվել է «Կոռնկ Հայոց աշխարհին» հանդեսում, իսկ հետո, կրճատումներով՝ «Արարատ» ամսագրում։ Ապստամբության մասին տեղեկություններ հաղորդող ժերուհին, լինելով Պապի աղականը, ավելի հանգամանորեն է խոսում նրա դժգոհության մասին, առհասարակ հայ զորահրամանատարների գծությունների մասին։ Մինչդեռ Դավթ բեկի պատմության հեղինակը անմիաբանության ու երկպառակությունների մասին աշխատում է քիչ խոսել, նրա նպատակը միաբանությունը պանծացնելն է։ Ինչպես նկատել է պրոֆ. Աշ. Հովհաննիսյանը, «կատարված

¹² «Կոռնկ Հայոց աշխարհին», 1863, էջ 622։

¹³ Տե՛ս Մատենադարան, ձեռ. 2888. «Համառոտություն պատմութեան Հայոց սկսեալ ի նախնոյն Հայկայ մինչև ցաւուրս Ղուկասու սրբազան կաթողիկոսին ցամ տեառն 1784 և Հայոց ՌՄԼԳ. բովանդակեալ ի վեց գիրս. Աշխատասիրեալ Զմիւռնացի Յովհաննու Մելիք-Սեփմեանց, յաւուրս Յովհաննէս սրբազան կաթողիկոսի ամենայն Հայոց յամի տեառն 1829 ի սուրբ էջ միածին», թղ. 334ր։ Ը դեպ, նշենք, որ այստեղ ևս կա մի տ՛աճ պատմություն, կապված Հովհ. Շահնաթուրյանի անվան հետ. «Յովհաննէս արքեպ. Շահնաթուրեանց, որ ժամանակ մի պահեալ զսա առ ի բաց հանեալ է զընդարձակ յառաջարանութիւն Հեղինակին հանդերձ ճակատագրովն մատենին և զվերջին շարունակութիւն պատմութեանն քանի մի գլխովը», — կարդում ենք Աեւագրի «Ազգի» մեջ (թղ. 5ա)։

¹⁴ Տե՛ս Մ. Մաղաթ-Թեոփիլյան, Կենսագրություն երեկի աւանց, էջ 185։ Հմմտ. Մ. Զամչյան, Պատմություն Հայոց, հատ. Գ, էջ 796, ձեռ. 2888, թղ. 337ա։

իրողությունների ստույգ շարադրանք լինելուց առավել, «Ընտիր պատմությունը» Սյունյաց երկրի նվաճողներին զինական դիմադրություն ցույց տալու հորդոր է: Գրքի պաղարարախոսական այդ ուղղվածության մեջ է հենց XVIII դարի կեսերին շարադրված այդ գործի բացառիկ արժեքը»¹⁵:

Դավիթ բեկը, ծերունի Սրապիոնի պատմելով, «Լեռցախի կողմերեն գաղթած երբեմն Վրաստուն ու երկար ժամանակ ծառայած յուրյանց արքունիքի միջին, վաստակած փառք-պատիվ և պաշտոն զորագլխության», գալիս է Սյունիք¹⁶: Այստեղ կան նոր անուններ, կան ռազմական կյանքի մանրամասներ, ինչպես՝ լրտեսների բերած տեղեկություններ, թուրքերի՝ վարձու զորքեր ունենալը, ղափանցիների՝ ավարը միայն շարքային զինվորականներին բաժանելու դեպքը և այլն:

Ուշագրավ է, թեպետ ստուգման կարոտ, հետևյալ վկայությունը, որ համահնչյուն է Կ. Շահնազարյանցի տեղեկությանը՝ «առ ժամանակյա կառավարության» մասին և չի հակասում Ղուկաս Սեբաստացու «Պատմությանը». «Որոտնա բերդը առնելն էր մի փառավոր հաղթություն, որիցը ծագեց հայերի մտքումը զանազան գաղափարներ, ուստի ժողովեցան բոլոր իշխանները, մեկիքները և երեկիները, խորհուրդ արին ու հաստատեցին զԴավիթ բեկն յուրյանց վերա ղլխավոր մեծավոր (սարդար), իսկ զմյուս մեկիքները կամ զորք ունեցողները զորավար անվանեցին, զոր օրինակ Մխիթար զորավար, Թորոս զորավար, Փարսադան զորավար ևլն. և խոսք կար թե, մտադիր են նշանակել զԴավիթ բեկը թագավոր և օծել Տաթևի վանքումն և թե սպասվում է վրաց թագավորեն դեսպան գա և թագ բերե»¹⁷: Ցավոք, ծերունի Սրապիոնի պատմածը նախ գրի է առնվել պարսկերեն և հետո է թարգմանվել հայերեն, այլապես կիմանայինք, թե ինչպես են կոչվել հայ զորահրամանատարները: Սա ասում ենք, նկատի ունենալով Լևոյի դիտողությունը. «Սպարապետ», «զորավար», «զորապետ», «իշխան» գործածական չեն եղել Ղափանում, այլ Դավիթ բեկի պատմությունը գրող Մխիթարյան վարդապետն է կիրառության մեջ մտցրել՝ հարմարելով հին հայկական տիտղոսներին»¹⁸:

Մի այլ տեղեկություն հաղորդում է Մ. Մաղաթ-Թեոփիլյանը, հնարավորություն տալով մոտավորապես որոշելու Դավիթ բեկի ծննդյան թվականը: Դավիթը, ասում է նա, «աքկալ հիւանդութեամբ մահու, որով և մեռաւ ի Հալիձոր, յամի տեառն 1728 ի հասակի իբր 54 ամաց. վարեալ զիշխանութիւն իւր զամս վեց»¹⁹: Եթե մահվան թվականը համարենք 1728-ը, ապա ըստ սույն տեղեկության Դավիթը ծնված պիտի լինի 1674 թ.: Բայց, ինչպես ճիշտ նկատել են հետազոտողները (Պ. Հարությունյան, Աշ. Հովհաննիսյան և ուրիշներ), այդ թվականը մերժելի է: Տեսանք, որ Կ. Շահնազարյանցի աշխատության մեջ Դավիթը մահացած է համարվում արդեն 1727 թ.: Եթե ճիշտ է այն ենթադրությունը, թե նրա մահվան թվականը 1726-ն է (ինչպես Հ. Կրուչինսկին էլ է վկայում), ապա նա ծնված պիտի լինի 1672 թ.:

15 «Բանբեր Երևանի համալսարանի», 1970, N 1, էջ 101: Հավանական է Սահակ Ճեմ-Ճեմյանի ենթադրությունը, թե «Պատմությունը» գրվել է 1736—1737 թթ. (տե՛ս «Բազմավեպ», 1972, թ. 4, էջ 492):

16 Տե՛ս «Արարատ», 1877, թ. ԺԱ, էջ 412:

17 Նույն տեղում, էջ 415—416:

18 Լևո, Հայոց պատմություն, հատ. Ե, էջ 674:

19 Մ. Մաղաթ-Թեոփիլյան, նշվ. աշխ., հատ. Ա, էջ 185:

Դավիթ բեկի ապստամբությունը նվիրված դրականության մեջ բավական շատ է խոսվել հերոսի ծագման և ծննդավայրի շուրջը, որոնց վերաբերող տեղեկությունները հակասական են ու անվստահելի։ Սրա պատճառներից մեկն այն է, որ ժամանակակիցների մեջ եղել են այլ բեկեր՝ նույն անունով (Դաւիթ, Դաւութ, Դաութ)։ Այժմ, թեև հեշտ է համոզվելը, որ այս կամ այն փաստաթուղթը կապ չունի Ղափանի շարժումների ղեկավարի հետ (այսինքն՝ այնտեղ հիշատակվող Դավիթը ուրիշ անձնավորություն է) կամ վերաբերում է նրան, բայց կեղծիք է, սակայն բավական դժվար է կողմնորոշվել, անվերապահորեն մերժել կամ հետևել հիշյալ փաստաթղթերին։ Ուստի պետք է առավելագույն զգուշություն ցուցաբերել այդ վկայությունների նկատմամբ։

Այդ կարգի վկայագիր է Մաշտոցի անվան Մատենադարանի № 5794 ձեռագրում Ղուզանանց Թաղիի հիշատակարանը, որին վստահում են ուսումնասիրողներից շատերը, անվերապահորեն հենվելով նրա վրա։ Մինչդեռ Թաղիի խոսքը բավական խառնաշփոթ է, հաճախ՝ անհասկանալի։ Պրոֆ. Ա. Աբրահամյանն, օրինակ, երբ հետևում է Ղուզանանց Թաղիին, գտնում է, որ Դավիթ բեկի հայրը Ալիխան²⁰ է, իսկ երբ օգտվում է Դանիել գրչի տեղեկություններից՝ Աստվածատուր²¹։ Բայց այդ ոտանավոր-հիշատակարանում հիշված Աստվածատուր Աբրոյանը Դավիթ բեկի հայրը չէ (անունները պատահամամբ համընկել են)։ Նկատենք, որ գրչի խոսքից չի կարելի եզրակացնել, թե Դավիթ բեկը սյունեցի է, «Հաբանդ գավառից» (թեպետ չի բացատրվում, որ Ղափանից լինի), ինչպես գրում է Ա. Աբրահամյանը։ Բայց նախ բերենք ոտանավորը.

Սակաւագիծ ճառս վիպական,	Ղօղեալ ելով ի հորշ անկեան,
Վիպէ զարարս քաջին Դաւթեան,	Ի տան մեծի քաջազարմեան,
Որ ի յԱբանդ տան Սինական	Աստուածատուրոյ մեծ Աբրօեան
Վասն հաւատոյ քրիստոսական:	Յորմէ առաք զպատճեն սորայն:

Բանաստեղծական առաջին տան երրորդ տողով հեղինակը նշել է Դավթի գործելու և ոչ ծննդյան վայրը։ Այս երկու տնով գրիչն ուզում է ասել՝ սույն համառոտ վիպական երկը («Պատմութիւն Դաւիթ պէկին») պատմում է քայ Դավթի սխրանքները Աբանդում, որ նա գործել է քրիստոսական հավատքի համար։ Ձեռագիրը, որից նա ընդօրինակում է, պահված էր քաջազարմ Աստվածատուր Աբրոյանի տանը։ Թերևս սա զմյուռնացի նշանավոր Ապրոյաններից է, որոնք Ամստերդամում մտերմական կապեր ունեին Պետրոս Առաքինի հետ²²։

Վստահություն չի ներշնչում նաև Մատենադարանում պահվող՝ փոխգրնդապետ Ստեփաննոս Դավիտովի ազգաբանության վերաբերյալ գրությունը²³։ Հրատարակիչը հնարավոր է համարում, որ սա կեղծիք լինի, բայց չնայած դրան լիովին վստահում է գրությանը։ «Հարց է առաջանում,— գրում է նա,—

20 Տե՛ս «Պատմա-բանասիրական հանդես» (հետադաշում՝ ՊԻՀ), 1972, № 4, էջ 178։

21 Նույն տեղում, էջ 167։

22 Տե՛ս Հ. Թաղևոսյան, Պատմություն տոհմի և կաղարյան ճեմարան արևելյան լեզվաց, Վիեննա, 1953, էջ 24։

23 Տե՛ս Ա. Աբրահամյան, Մի էջ Անդրկովկասի ժողովուրդների և հայ-ոռոսական հարաբերությունների պատմությունից, Երևան, 1953, էջ 237—239։

չի՞ կարող պատահել, որ գնդապետ Ստեփանոսը, ազնվականի կոչում ստանալու համար, կեղծած լինի իր գեներոզիան՝ աշխատելով կապել իրեն Սյունիքի ազատագրական շարժումներում հերոսացած Դավիթ-Բեկի հետ։ Անհավանական ոչինչ չկա, մանավանդ եթե նկատի ունենանք, որ այդ ժամանակ ազնվական կոչում ստանալու համար փաստաթղթեր կեղծելը սովորական երեւոյթ էր։ Սակայն, առայժմ, մենք փաստեր չունենք տվյալ վավերագիրը կեղծ համարելու»²⁴։

Ինչ վերաբերում է Դավիթ բեկի որտեղացի լինելուն, կարելի է պնդել, որ նա Սյունիքից է՝ լայն առումով, ներառյալ նաև Ղարաբաղը։ Ավելի ճշգրտել առայժմ հնարավոր չէ, առկա փաստերը թույլ չեն տալիս։

Դավթի ծագման վերաբերյալ թերևս միակ վստահելի տվյալը «բեկ» կոչումն է, որ մատնացույց է անում իշխանական (մելիք) զարմից լինելը։ Բայց ահա Պ. Հարությունյանը թերագնահատում է այս փաստը։ Ամենուր «գյուղացիականը» տեսնելու նրա ձգտումն այստեղ ըստ երևույթին վճռական դեր է կատարել։ Իբրև պոստուլատ ընդունելով Դավթի հասարակ ծագումը, նա գրում է. «Դավիթ բեկի նման նա (Մխիթար սպարապետը) «բեկ» տիտղոսը կրում էր ոչ թե տոհմական ծագման իրավունքով, այլ իբրև ռազմական կազմակերպիչ և ղեկավար Ղափանի հայերի», այնուհետև շարունակելով՝ «Ինչպես Դավիթ բեկին, այնպես էլ Մխիթար բեկին մեկ համարում ենք ժողովրդական զանգվածների շահերի ներկայացուցիչ և շարժումների ղեկավար»²⁵։ Կարծում ենք, որ հարցը մնում է չլուծված։

Ժամանակին «Դավիթ բեկ» վեպի պատմական հիմքը և գաղափարական արժեքը՝ ոչ մեծ, բայց ծանրակշիռ իր հոգվածում ն. Ադոնցը լուծել է Ղափանի ապստամբության հետ կապված մի շարք հարցեր, որոնք հետագայում նորից և իզուր զբաղեցրել են ուսումնասիրողներին։ Սրանք հաճախ հանգել են նույն եզրակացություններին, ինչ ն. Ադոնցը, երբեմն էլ, անգիտելով նրա ուսումնասիրությունը, սխալ ուղիով են ընթացել, և որքան դյուրահավատ են եղել պատահական փաստաթղթերի նկատմամբ, նույնքան կասկածով են նայել Դավիթ բեկի «Պատմությանը»։ Քննադատական վերաբերմունքը ի վերջո անցել է իրավացիության սահմանները, հանգել մանրախնդիր, ինքնանպատակ «սրբագրումների»։

«Ստեփանի ավանդած պատմությունը բավականին խառնակ է։ Ինքը՝ անվարժ պատմող, Ղուկաս վարդապետը՝ վարժ գրող, միասին աշխատելով շատ բան շփոթել են, չափազանցել և երբեմն գայլվահանյան գույն տվել, խախտելով ընթերցողի վստահությունը», — իրավացիորեն գրել է ն. Ադոնցը²⁶։

²⁴ Նույն տեղում, էջ 94 (ընդգծումները մերն են)։ Փաստերի նկատմամբ կողմնակալ այս մոտեցումը եզակի չէ։ Մի այլ հարցի կապակցությամբ Ա. Արրահամյանը գրում է. «Ըստ Պետրոս դի Սարգիս Գիլանենցի տեղեկության, խանական զորքերը փորձել են Սյունիք խուժել 1723 թ. ամռանը։ Այդ մասին նա հաղորդել է ոռոսական արքունիքին. «Վերոյ թարեղումն (նկատի ունի 1723 թ. օգոստոս ամիսը) որ խարար արեկ, — գրել է նա ոռոսական արքունիքին, — թն զգյրաշն զնացել այ Ղափանստան մտել...»։ Մինչդեռ Գիլանենցը, այնտեղ, որ Ա. Արրահամյանը կախման կետեր է դրել, ավելացնում է. «էս խարարն էլ զեռ ճիշտ չէ» (Նմատ. «Կոռնկ Հայոց աշխարհին», 1863, էջ 207 (Ա. Արրահամյան, Մի էջ..., էջ 85, «ՊՐՀ», 1972, № 4, էջ 170)։

²⁵ П. Т. Арутюнян, Освободительное движение армянского народа в первой четверти XVIII века, М., 1954, էջ 270 (ընդգծումները մերն են)։

²⁶ Տե՛ս «Բաֆֆի (Հակոբ Մելիք-Հակոբյան). կյանքը, գրականությունը, հիշողություններ» ժողովածուն, Փարիզ, 1937, էջ 129։

Անդրադառնալով այն հարցին, որ Գուգարաց («Պատմության» ընդարձակ խմբագրության՝ Վենետիկում պահվող ձեռագրում՝ Քուքարացոց)²⁷ Հովհաննես իշխանին վերաբերող տեղեկությունները կցկտուր են ու անհասկանալի, Ն. Ադոնցը գրում է. «Գուգարացի՝ Ղուկաս վարդապետի ենթադրությունն է, որ ներել կարելի էր եթե Գագուրացի ասեր, համաձայն հորենացու գործածության։ Թվում է թե Հովհաննեսն այն Ավանն է, մինը չորս կտրիճ երիտասարդներեն, որ զենքով դիմադրեցին լեռնականներին Ջրաբերդում։ Հավանական է, որ Ավանը ուղեկցած լինի Դավիթ բեկին կամ լուրեր տարածված լինեին, թե համայնի երկրից օգնություն պիտի գար նրան»²⁸։ Հովհաննես Գուգարաց իշխանի և Ավանի այս ենթադրական նույնացումը հետագայում օրինականացվեց, և խոսք անգամ չկա Ն. Ադոնցի սույն ենթադրության մասին։ Այդ կապակցությամբ Ա. Աբրահամյանը գրում է. «Ղարաբաղից Սյունիք եկած այս օգնության մասին տեղեկություն կա և «Ընտիր պատմութեան» մեջ... Այստեղ «Ընտիր պատմութեան» հեղինակը, սակայն, թույլ է տվել երկու անձնություն. Դիզակի Ավան յուզբաշուն դարձրել է գուգարեցի և Ղարաբաղի 20000 հույուց բաղկացած զորաբանակի թիվը մեծացնելով հասցրել 56000-ի»²⁹։ Նկատելի է, որ այս «սրբագրությամբ» չի հարթվում, հասկանալի չի դառնում Հովհաննես իշխանի առեղծվածային արշավը դեպի Ղափան։

Թյուրիմացությունը, ինչպես տեսնում ենք, սկսվել է նրանից, որ ուսումնասիրողները Հովհաննես իշխանին փնտրել են երբեմնի բղեշխություն Գուգարքում (Լոռի, Ջավախք, Արդահան ևն) և ավելորդ կրքով բնագատել Դավիթ բեկի «Պատմության» բնագիրը, մինչդեռ խոսքը վերաբերում է Գագուրեցի ինչպես կոահել է Ն. Ադոնցը։

Դիզակի Գտիչ վանքի վանահայր Առաքել վարդապետի աշխատության մեջ (որ Բաֆթու «նամասյի մեկիքությունները» աշխատության ձեռագիր աղբյուրներից մեկն է, հետագայում մասամբ հրատարակված) մի այլ, ավելի հին ձեռագրից մեջբերված են պատմական տեղեկություններ։ Ահա դրանցից մեկը. «...մինչ երկիրս ընդ տիրապետութեամբ պարսից իշխանութեանն կայր, ի թուականիս հայոց ՌՃՀԱ (1722) էր, եկն համբաւ յայնկոյս կողմանցն Կուր ղետոյն, թէ գուգարացիք (այսինքն շաքեցիք) միաբանեալ են ընդ լեռնաբնակ ազգին լեղկաց՝ չծառայել բնաւին իշխանութեան պարսից և շտալ զպայմանեալ զարքունական հարկսն»³⁰։ Այս ուշագրավ տեղեկությունից մեղ տվյալ պահին հետաքրքրում է գուգարացիք բառի բացատրությունը՝ «այսինքն շաքեցիք»։ Ի միջի այլոց Առաքել վարդապետը ուրիշ անգամ գործածում է նաև «զագուրացիք»³¹։ Դա չի՞ նշանակում, թե գոնե XVII դարում այս երկու անվանումները զուգահեռաբար գործածվել են։ Հնարավոր է, որ «Գագուրքը», անմասնելով հիշյալ բղեշխության անվանը, դարձել է «Գուգարք», բայց այդ

27 Տե՛ս «Բազմավեպ», 1938, Թ. 6—9, էջ 180։

28 «Բաֆթի» ծոցովածու, էջ 126։

29 «ՊԲՀ», 1972, N 4, էջ 172. Հմմտ. նաև Ա. Գ. Արրահամյան, Մի էջ Անդրկովկասի ժողովուրդների և հայ-ուսական հարաբերությունների պատմությունից, էջ 83, նույնի՝ «Դավիթ բեկի պատմության» նախագաղափար բնագիրը», «Բանբեր Հայաստանի արխիվներին», 1972, N 3, էջ 90, 110։

30 «Նյութեր հայ մեկիքության մասին», Ա. պր., Առաքել վարդապետ, Դիզակի մեկիքությունը, Վաղարշապատ, 1913, էջ 14։

31 Տե՛ս նույն տեղում, էջ 16։

վերջին ձևն ավելի է ընդհանրացել: «Գուգարբի» գործածության բազմաթիվ փաստերից հիշենք մեկ-երկուսը:

«Այս աշխարհ Գուգարաց ասի ևս լինել ի սահմանակցութեան Աղուանից. և այս վասն այնորիկ՝ դի է առ երկրի Ուտի աշխարհին, որ համարիւր մասն Աղուանից. և կոչիւր Աղուանք Հայոց»³², — գրում է Մ. Չամչյանը: Նա Հովհաննես իշխանի մասին խոսելիս գործածում է երկու անուն՝ «ուտեացոց» և «գուգարացոց»³³: Այս Գուգարբը Ուտիքի հետ նույնացվում է նաև Մ. Չամչյանի հետևողությամբ շարադրված պատմություններում: Հովհ. Մելիք-Սելիմյանցն, օրինակ, գրում էր. «Ջայն տեսեալ հայոց բնակելոց յաշխարհին Ուտեցոց կամ Գուգարացոց՝ որ ի Մեծ Սղնախ. յորում և տիրէր Յոհաննէս իշխան ոմն...»³⁴: Մի օրինակ էլ բերենք Մ. Չամչյանից. «Եւ բազումք ևս շոքան յաշխարհն ուտեացոց և դուգարացոց և յարեցան ի մեծ իշխանն Յովհաննէս: Եւ սա ինքն Յովհաննէս ևս բազումս պատերազմեալ ընդ այլազգիս՝ հուսկ յետոյ էտ դքաղաք իւր ի ձեռս նոցա. և ինքն քանի մի ընկերօք ճանապարհորդեալ ընդ Կասպից ծով՝ գնաց յԱժդարխան. և անդ մեծարեալ յիշխանէ տեղւոյն՝ եգիտ պառիւ ի նմանէ»³⁵: Սա չի՞ նշանակում, թե ճիշտ չէ Հովհաննէս իշխանին Ավանի հետ նույնացնելը: Վերջինս վերաբնակվել է ոչ թե Աստրախանում, այլ՝ Գիլանում:

Ն. Ադոնցը դիտողություն է արել և Ղուկաս Սեբաստացու շարադրանքի սկզբի վերաբերյալ. «Գործի նախաձեռնությունը Ստեփանը վերագրում է իրեն: Այս կետը ավելի քան կասկածելի է. ...Եթե Ստեփանը լիներ մեծ խորհուրդի հղացողը, Դավիթ բեկը նրան իր մոտ կպահեր իբրև մերձավոր գործակից»³⁶: Հետագայում այս դիտողությունը ևս ոմանք կրկնեցին³⁷: Բայց պետք է նկատել, որ Ն. Ադոնցին հայտնի չէին որոշ հանգամանքներ, որ պարզվեցին հետագայում: Դրանցից է այն, որ Պատմությունը շարադրելիս Ղուկաս Սեբաստացին միայն մեկ թելադրող չի ունեցել. Շահումյանից բացի նրան ապրստամբության մասին պատմել են «Տեր-Ավետիսը և ուրիշներ», ուրեմն այս բանը հաստատած պիտի լինեն նաև մյուս պատմողները: 1938 թ. հայտնի դարձավ այս փաստը՝ Եղիա Փեշկյանի հաղորդման շնորհիվ: Դրան ծանոթ չէր նաև Լեոն, որ Շահումյանի՝ թուղթը տանելու վարկածը «անարվեստ հերյուրանք» է համարում, արդյունք նրա սնապարծության³⁸: Պ. Հարությունյանը այս կապակցությամբ քննադատում է «Պատմության» հեղինակին այն բանի համար, որ նա իբր աշխատում է մթագնել Ղափանի ազատագրական կռիվների ժողովրդական, գյուղացիական բնույթը³⁹:

Գրեթե բոլոր աղբյուրները վկայում են, սակայն, որ այդպիսի գրություն

32 Մ. Չամչյան, Պատմություն Հայոց, հատ. Գ, Վենետիկ, 1786, էջ 142:

33 Տե՛ս նույն տեղում, էջ 784: Հմմտ. նաև Ե. Գեղամյան, Հայերի ազատագրական շարժումների ժԸ դարում, Բաքու, 1915, էջ 162. „Bibliographia Caucasica et Transcaucasica, Опыт справочного систематического каталога печатным сочинениям о Кавказе, Закавказьи и племенах, эти края населяющих», составил М. Миансаров, т. I, отд. I и II, СПб., 1874—1876, էջ 549:

34 Մատենադարան, ձեռ. 2888, թղ. 334ա:

35 Մ. Չամչյան, նշվ. աշխ., էջ 800:

36 «Բաֆֆի» ժողովածու, էջ 130:

37 Տե՛ս, օրինակ, Ա. Աբրահամյանի հոդվածը, «ՊԲՀ», 1972, № 4, էջ 162—163:

38 Տե՛ս Լեոն, Հայոց պատմություն, հատ. Գ, էջ 668:

39 Տե՛ս Պ. Հարությունյան, նշվ. աշխ., էջ 249:

եղել է, իսկ դրանց մեծ մասը հաստատում է նաև, որ գրությունը տարել է Ստեփանոս Շահումյանը. աղբյուրներից մեկը նույնիսկ, ինչպես տեսանք, Շահումյանին անվանում է Ելչի Ստեփան:

Իհարկե, նամակը տանելը չի նշանակում, թե «մեծ խորհուրդի հղացողը» Շահումյանն էր: Այս հարցում կա՝ կեղծիք՝ այն, որ 50 մեկիքների փոխարեն Շահումյանն է ստորագրել թուղթը, և դա արված է ոչ սնափառության համար, այլ հեռատեսորեն, նախաձեռնողների խմբին շմատնելու համար: Չէ՞ որ նրանց մեծ մասը հայրենիքում էր, հակառակորդների շրջապատում, իսկ պայքարը, եթե մարել էր, չէր ավարտվել: Պատմությունը ոչ թե ավարտված, անօրհաս-զնացած իրադարձությունների պարզ արձանագրություն էր, այլ կենդանի, ընթացիկ կյանքին վերաբերող վավերաթուղթ⁴⁰:

Որ Շահումյանը, Տեր-Ավետիսը և մյուսները 30-ական թթ., կամ գուցե փոքր-ինչ ուշ, զգուշանալու էին, երևում է նաև Արցախի մեկիքների և ռուսական արքունիքի նամակագրությունից: Ապստամբությանը վերաբերող հարցերի մասին ինչպես նրա մասնակիցները, այնպես էլ ռուսական արքունիքը, զգուշությամբ էին խոսում: Մինաս վարդապետը ևս 1736 թ. զգուշանում էր: «Խշնամինները՝ թուրքերն ու պարսիկները, իմացել են մեր գաղտնիքը, — հայտնում էր նա կոմս Ս. Սալտիկովին հղած ղեկուցագրում, — իսկ ինձ համար այդ պատճառով և՛ թուրքական, և՛ պարսկական հողերը՝ հարադատներիս մոտ, գրեթե անհնարին է»⁴¹:

Պրոֆ. Ա. Աբրահամյանն ընդունում է, որ Դավիթ բեկին հրավիրել են Սյունիք, չնայած տաբակուսանքով է խոսում մեզ հետաքրքրող հարցի մասին: «Ստացվում է այնպես, — գրում է նա, — որ եթե չլինել Ստեփանոս Շահումյանը, ապա ո՛չ վրաց արքունիքը Դավիթ բեկին կուղարկեր Սյունիք, և ո՛չ էլ այնտեղ ազատագրական շարժումներ կառաջանային»⁴²:

1790 թ. Հովսեփ Արղուիսյանը գրում էր Եկատերինա II-ին, թե հայ մեկիքները, հուսով, որ Պետրոս I-ը օգնության կհասնի, Շահնավադին խնդրեցին իրենց տալ հմուտ զորահրամանատար, որ կարողանա ղեկավարել իրենց զորքերը: Եվ Դավիթ բեկը հավաքում է մինչև 60.000 զորք, հրամանատար նշանակելով Ավան խան Միրզային ու Ավանին, ինքը ղլխավոր զորախմբով բանակում է Ղափանում, «Չավունդուրի մոտ»⁴³: Ըստ մի այլ տեղեկության, նույնպիսի խնդրանքով մեկիքները 1725 թ. դիմել են կայսերը⁴⁴: Սա անհասկանալի է և քիչ հավանական:

«Վկայագիր Ուռպեղեանց» կոչված վավերագիրը (որ կազմված է 1835 թ.) հաղորդում է. «Բնակիչը Սինեկացի 1722 ամին զրեցին ղթուղթ աղաչանաց առ Շահնաւադ իշխան՝ առաքել զօրաւոր ոք զի իշխեսցէ ի վերայ դաւառին և յանդորրո պահեսցէ զՀայս որք ի նմին»⁴⁵: Րաֆֆու օգտագործած ձեռագրերն էլ հաստատում էին, որ Ղարաբաղի մեկիքներն են դիմել Շահնավադին⁴⁶:

40 Հմմտ. «Բանբեր Երևանի համալսարանի», 1970, № 1, էջ 101:

41 Г. А. Эзов, Сношения Петра Великого с армянским народом, СПб., 1898, էջ 461:

42 «ՊԲՀ», 1972, № 4, էջ 163, նաև 162, 164:

43 Տե՛ս Собрание актов, относящихся к обозрению истории армянского народа, ч. II, М., 1838, էջ 55:

44 Տե՛ս նույն տեղում, էջ 194:

45 Րաֆֆի, Դավիթ բեկ, Վիեննա, 1903, էջ 787:

46 Տե՛ս Րաֆֆի, Խամսայի մեկիքությունները (1600—1827), Նյու-Յերկ հայոց նոր պատմության համար, Երկրորդ տիպ, Թիֆլիս, 1895, էջ 33:

Միայն Գ. Շերմազանյանի վերևում հիշված ուղեգրության մեջ է, որ մեղ հետաքրքրող շրջաբերականի նախաձեռնողը ուրիշն է՝ ոմն Ռուստամ խան, որո «Կարաբաղի երևելի մելիքներեն և ժողովրդեն» գրություն է տանում «վրաց թագավորին ու միջնորդներ ձգում, որպեսզի զորք ուղարկե օգնել նոցա և զինքը զորավար կարգե», իսկ թագավորը «մերժում է նրա առաջարկությունը և նշանակում է մի քաջ անձն Դավիթ բեկ անուն, Արցախի կողմերեն դադիված երբեմն Վրաստուն ու երկար ժամանակ ծառայած յուրյանց արքունիքի միջին, վաստակած փառք և պաշտոն զորագլխություն»⁴⁷:

Առկա փաստերն անբավարար են և հնարավորություն չեն տալիս վերջնականապես ճշտելու խնդիրը: Շահումյանը կարող էր լինել նաև պատվիրակության անդամ: Բայց տվյալ դեպքում այնքան կարևոր չէ՝ ով է հիշվում իբրև նախաձեռնող, որքան՝ շրջաբերականի գոյությունը, որ կասկածից վեր է:

Որոշակի տվյալներ չունենք մենք Ղափանի շարժման կողմնորոշման մասին: Հավանաբար զխավորապես այս խնդրի կապակցությամբ են եղել տարածայնությունները ապստամբության ղեկավարների միջև, որ ավելի աշխուժացան Դավթի մահից հետո: Ծիշտ է, Ղարաբաղում ևս կային տարբեր կողմնորոշումներ, բայց ուժեղ թևը, ճնշող մեծամասնությունը Ռուսաստանի կողմն էր: Ի՞նչ հիմք կա այդպես մտածելու: Ամենից առաջ այն, որ Արցախը մշտական կապ ուներ ռուսաց արքունիքի հետ, իսկ Ղափանը՝ ոչ: Արքունիքի գրագրությունների մեջ դեպքից դեպք էր հիշվում Ղափանի անունը: Իվան Կարապետը մշտապես Ղարաբաղում էր նստած և այլն: Ըստ երևույթին, Ղափանում ռուսական կողմնորոշումը ներկայացնողները նրանք էին, որ Դավիթ բեկից հետո, Մխիթարի զխավորությամբ դիմեցին ռուսներին՝ օգնության խնդրանքով: Դավթ բեկը հավանաբար հույսերը կապում էր սեփական, ներքին ուժերի հետ:

Արդյոք կողմնորոշման հետ չէ՞ր կապված այն հանգամանքը, որ Տեր-Ավետիսը, Ստեփանոս Շահումյանը և ուրիշներ, ավարտված համարելով իրենց առաքելությունը կամ գուցե գծավելով ընկերների հետ, գնացին Խտալիա, իսկ ոմանք՝ Պարսկաստան: Մինչդեռ Արցախի ապստամբության ղեկավարները վերաբնակվեցին կամ Ռուսաստանում, կամ նրա յուրացրած մերձկասպյան հողերում: Մխիթարի մահից հետո, ըստ Հովհ. Մելիք-Սելիմյանցի, «ցրուեցան զօրք Մխիթարայ: և բոք իշխուներ էին Դավթի յալլ և այլ տեղիս անդլուխ մնացելալ գնացին ի Պարսս, և բազումք ևս յարեցան ի մեծ իշխանն Յոհաննէս որ յաշխատհին Գուգարաց»: Այնուհետև՝ «Եւ սա ինքն Յոհաննէս ևս՝ բազումս պատերազմել ընդ այլազգիս՝ հուսկ յետոյ ետ զքաղաք իւր ի ձեռս նոցա. և ինքն քանի մի ընկերօք ճանապարհորդեալ ընդ Կասպից ծով՝ գնաց յԱթտարխան. և անդ մեծարեալ յիշխանէ տեղոյն՝ եգիտ պատիւ ի նմանէ»⁴⁸:

Կողմնորոշումների վերաբերյալ մեր այս ենթադրությունը չի՞ խանգարում հետևյալ փաստերի առկայությունը. Իվան Կարապետի ղեկուցագրում ղափանցիների մասին գրված է. «Եւ ևս թագավորին ուբաղն նշանց տվի, կարդացին. ոխ յմիայրերան ասում ան թէ, մեք թագավորին ծառայ ևանք»⁴⁹: Չալապի քննության 1724 թ. նոյեմբերի 5-ին արտաքին գործոց հանձնաժողովին տվել է նույն-

⁴⁷ «Արուրատ», 1877, ժԱ, էջ 412:

⁴⁸ Մատենադարան, Աճ. 2888, Թղ. 338: Հմմտ. Մ. Չամչեան, նշվ. աշխ., էջ 800, Մ. Մառաբ-Պետիկան, նշվ. աշխ., էջ 186:

⁴⁹ Ա. Արրահամյան, Մի էջ Անդրկովկասի..., էջ 213:

պիսի վկայություն: Իվան Կարապետը հակված էր արքունիքին ցույց տալու, թե ինքը Հայաստանում մեծ գործունեություն է ծավալել: Մյուս կողմից, հայկական շարժման շահերը պահանջում էին նաև նման հավաստիացումներով ուսաներին գրավել իրենց կողմը: Որ պատվիրակը հեռվից-հեռու էր ծանոթ Ղափանի իրավիճակին, երևում է նրա 1725 թ. մայիսի 11-ի զեկույցից. «Իսկ այժմ սուրհանդակներ եկան Երևանից, հարցրինք՝ ի՞նչ տեղեկություններ կան: Ասացին որ՝ յոթը հարյուր հոգի եկել է դեսպանի հետ, չենք իմանում, մերոնցից է, թե թագավորի որդի Շահնավազ խանի մարդն է: Նրա անունը Դավիթ լիկ է: Նա ապրում է Ղափանում: Տեղացի հայերին հավաքել է իր շուրջը: Թուրքերը եկել են, կռիվ են տվել և նրանցից շատերին կոտորել: Այժմ, ասում են, որ այնտեղ թուրքեր չկան»⁵⁰:

Արցախի հայերն աշխատում էին ամեն կերպ հրապուրել ուսաներին, հայտնելով, թե հայ ժողովրդի համակրանքը նրանց կողմն է, հաճախ չափազանցված տեղեկություններ էին հաղորդում երկրի հարստությունների մասին և այլն: Այդ նպատակն ունեին Չելեպիի ու մյուսների հայտարարությունները⁵¹: Իսկ երբ ուսաները խոստովանեցին, որ թուրքերի և պարսիկների հետ կնքած դաշնագրերը իրենց թույլ չեն տալիս օգնելու հայերին, Աղվանից Եսայի, Ներսես կաթողիկոսները և Արցախի մելիքները հայ ժողովրդի անունից դիմեցին Պետրոս 1-ին (1725 թ. հունիսի 25-ին, երբ նա արդեն մահացել էր), տեղեկացնելով, թե թուրքերի վերջնական նպատակը, հայերին ոչնչացնելուց հետո, «ուսաներից մեր երկիրը մաքրելն է»։ «Օսմանլուէն Զմ(6000) մարդ մեզ վերայ զօշուն եկին. ձեր զօրութեամբն կոտորեցինք, և մէկ փաշա ողջ բռնեցինք. զնա խօսացրինք, դուք ինչպես էք հկել այս երկիրս, նա ասաց, մեր թագաւորն հրաման է արարել, որ պիտի մեք այս երկիրներս հայն և զզլաւշն փշացնեմք. շուն որ ըռուս թագաւորի զօրքն ծովի այս կողմս են անցել, մեք նոցա վերայ պիտի գնամք. հայն այս մէջս չպիտի և այս երկրներս խարապ պիտի լինի, որ մեր ճանապարհն բացուի. նաև ասաց այս փաշան. թէ դուք չէիք այս մէջս մեք հիմա Դարպանդու և Պաքու վերայ էինք գնացել, որ ղատիմի մերն է»⁵²: Ղափանի շարժման ուսական կողմնորոշման մասին վկայողները Արցախի ուսասեր մելիքներն էին և Պետրոս դի Սարգիս Գիւանենցը: Վերջինս գրում էր. «Մեր հայոց ասկարն որ բոլորվել ան՝ ասում ան՝ թէ Կմ(60000) մարդ այ, Գ(3) բօլկ ան, որ Գ(3) տեղ նստած ան՝ նոցայ մին աչկն Աստուծոյ լուսին այ, մին աչքն մեծ թաղաւորին ճանապարհին այ... էն խեղճ խայէրն՝ որ բոլորվել ան՝ մեծ Եփրատօր թագաւորին անման ան բոլորվել»⁵³: Ղափանցիներին՝ մեղ հայտնի միակ հավաստիացումը իրենց ուսական կողմնորոշման մասին 1726 թ. Մխիթարի գլխավորությամբ շարագրված ուղերձն է⁵⁴:

Անհետաքրքիր չէ նաև այն հարցը, թե սյունեցիները որտեղից էին ձեռք բերում զենք ու դինամիթեր: Այդ կապակցությամբ, հենվելով մի մասնավոր փաստի վրա, Ա. Աբրահամյանը գրում է. «Եվ այսպես, պարզվում է, որ սյունեցիները հրազենը ձեռք էին բերում Թավրիզի առևտրական շուկա-

⁵⁰ Նույն տեղում, էջ 229: Նամակի բնագիրը տե՛ս էջ 226:

⁵¹ Տե՛ս Կ. Եզյան, նշվ. աշխ., էջ 379, 387, 445 և այլն:

⁵² Կ. Եզյան, նշվ. աշխ., էջ 422:

⁵³ «Կոունկ Հայոց աշխարհին», 1863, թ. Բ, էջ 209:

⁵⁴ Տե՛ս ՀՍՍՀ ԳԱ «Տեղեկագիր» (հաս. դիտ.), 1952, № 3, էջ 83—99. Պ. Հարությունյան, նշվ. աշխ., էջ 273—274:

յում»⁵⁵։ Դժվար է հավատալ, սակայն, որ ապստամբների միակ հույսը Թավ-
րիզի շուկան լինի։ Կարծում ենք, որ ապստամբները զենք կարող էին ձեռք
բերել զանազան ճանապարհներով, պատրաստում էին և իրենք։

Դավիթ բեկի պատմության հեղինակը հայ մարտիկների յուրաքանչյուր
հաղթանակ նկարագրելուց հետո շեշտում է, թե նրանք տիրեցին թշնամու ու-
նեցվածքին։ Հասկանալի է, որ դրաված դույքի մեջ մտնում էին զենքն ու զի-
նամթերքը։ Իսկ ավար վերցրած անասունների մի մասը բնականաբար պիտի
օգտագործեին իբրև պարեն, Պատմության համառոտ խմբագրության մեջ, որ
մեքենագիր օրինակից հրատարակել է պրոֆ. Ա. Աբրահամյանը, կարգում
ենք. «Եւ ինքն (Մխիթար զօրագլուխն) դարձ արարեալ անտի եկեալ ժամանակ
ինչ բնակեցաւ ի յամուրն ինձորէկս, և անդ իւրոց զօրացն հարեալ թոփով,
սպանին»⁵⁶։ Ա. Աբրահամյանը այս առթիվ 58-րդ ծանոթագրության մեջ զար-
մանքով գրում է. «Հայերը թնդանոթներ չունեին, Սյունիք թնդանոթ կարող էին
բերել և գործածել թուրքական զորքերը»⁵⁷։ Այնինչ շատ բնական էր մտածել,
որ թուրքերի թնդանոթների մի մասը, իբրև ռազմական ավար, կարող էր անց-
նել հայերի ձեռքը։

Գևորգ Մելքիսեդեկյան-Խուբովը իր Գավազանագրքում ավարի մեջ հիշում
է և զենքը. «Դարձեալ ժողովեալ այլազգեացն 22 հազար վառելոց ի Մեղրի
քաղաք և առաքեաց Դաւիթ զտէր Աւետիք և զՄխիթար զապիրատս իւր 66-
միայն կորովելօք և հնարիւք և ահարկութեամբ և անպատմելի քաջութեամբ
զորս կոտորեցին և զորս գետակուր կորուսին և ինքեանք աւարաց և զարդուց
և զինուց նոցա տիրեցին»⁵⁸։

Այս հարցին վերաբերող շատ տեղեկություններ կան Գ. Շերմազանյանի
վերոհիշյալ ուղեգրության մեջ։ Ծերմազանյանի Սրապիոնը պատմում էր. «Դավիթ
բեկի զալու օրեն տարածվել էր ամենայն տեղ լուր, թե ռուսի թագավորը մեծ
զորքով դուրս է եկած Դարբանդ, Բագու և գալիս է հայերի հետ միանա, ընդ-
դեմ պարսից կռիւլ անե, և սրա համար էլ սարի էն կողմի, այսինքն Գյուլիս-
տանի, Խաչենի, Վանանի, Դուզախի և Զարաբերթի հայ մելիքները զորք են
պատրաստում։ Էս էլ ավելացնում էին, թե ռուսի թագավորը մեծ գումարի
դրամ, վառող, արճիճ է ղրկել հայերի համար, բայց վրաց թագավորն գրավել
է, չէ կամենում առաքել, շատերն էլ հաստատում էին, որ վրաց թագավորն ու-
ղարկել է, բայց սարի էն կողմի վերոհիշյալ մելիքները թույլ չեն տալիս բերեն
մեղ հասցնեն։ Էս եկավ-եկավն, ասուլիսն որքան հայերին քաջալերում էին,
հույս էին տալիս, էնքան էլ թշնամիները վհատում էին։ Բայց նրանց ուշանալն
և սուտ լինելն մեքերի ակնկալությունները ի վերջո ի դերև հանեցին»⁵⁹։

Առանձնապես հետաքրքիր է Սրապիոնի մյուս վկայությունը, որի համա-
ձայն աղջիկները, կանայք ոչ միայն «պատմուճաններ, կարգվի արախչիներ,
վառողի ու գնտակի ամաններ, կոճերի փաթաթոցներ (տուլաղ), շապիկ նախ-
շած կուրծքով և այլ հագուստներ կկարենին, կասեղնագործեին», այլև վառող

55 «ՊԲՀ», 1972, № 4, էջ 173—174։ Ա. Աբրահամյան, Մի էջ Անդրկովկասի...,
էջ 86։

56 «Բանբեր Հայաստանի արխիվներին», 1972, № 3, էջ 107։ Ուղղումները կատարել ենք
Ս. Փելիկյանի հոգովածի համաձայն։

57 Տե՛ս նույն տեղում, էջ 113։

58 ՀՍՍՀ ԳԱ «Տեղեկագիր» (հաս. գիտ.), 1950, № 1—2, էջ 71։ Հմմտ. Մ. Զամչեան,
Կղզի. աշխ., էջ 796։

59 «Արարատ», 1877, թ. ԺԱ, էջ 419։

Լին պատրաստում: Աղջիկները «յուրյանց նշանածները պատերազմի տաք տաք ժամանակն են ընտրած»: Սրապիոնն ինքն էլ Որոտանի բերդի առման ժամանակ է ընտրել հարսնացու. «Երբ վառողս պակսեց, հանդուցյալն երկու բուռն՝ լուր ձեռոք շինածեն պարգևեց ինձ: Ահա տեսեք ի՞նչով էին պարապում էն ժամանակն կանայք»⁶⁰:

Հարցի մասին որոշ պատկերացում կարելի է կազմել նաև անուղղակի աղբյուրների օգնությամբ: Հնարավոր է, որ ռուսները ապստամբներին տրամադրած լինեն զենք ու ռազմամթերք: Պետրոս դի Սարգիս Գիլանենցի մի թըղթում գրված է. «...յալբաթէ բարաթըն, առճիճըն տէք պարոն էյվազին, որ բերի, և մին էլ խնդրէլամ՝ որ մի գիր յինք առուս աղարկէս ղօսպօտին բըղայդէրին վերայ, որ մեզ թէ բարութ պէտկ լինի՝ տայ»⁶¹:

1724 թ. նոյեմբերի 5-ին արտաքին գործոց հանձնաժողովին արված հայտարարության մեջ ասվում էր, որ չարաբաղի ապստամբների զորքը զինված է հրացանով և սուսերով, հեծյալները՝ ատրճանակով, «վառող և արճիճ նրանք բավականաչափ ունեն, և այդ զենքը, վառողը և արճիճը պատրաստում են հայերը իրենք, որովհետև շնայած երկաթի ու պղնձի հանքեր կան, բայց թնդանոթ սարքող վարպետներ չունեն»⁶²: 1729 թ. հոկտեմբերի 21-ին Ռարխան յուզբաշին նույն հանձնաժողովին հայտարարել է, թե ղարաբաղցիները կրում են իրենց պատրաստած զենքերը⁶³:

Իվան Կարապետը «բարոն գրափ Գավուէլ Իվանիչ Գուլովքինին» գրում էր. «էսպես կռուարար խալղ որ էս տեղ կա (խոսքը Ղարաբաղի մասին է), ոչ ինչ տեղ չկայ, ղզլպաշի երկրում էսօր ԺԲԹ(12000) մարդ ձիաւոր ողջ չախմախով. ֆուֆանկ, ողջ թուրով հազիր են, այլ և առանց ձիով էլ յէնչանք որ աստուած խպար, ու ողջին էլ թաֆանկ կայ, ամէն ուր (օր) Ժ(10) թուֆանկայ շինում ու չախմախայ շինում, այլ և էս տեղ քան (հանք) ան դտել արջիջի, երկաթի և պղնձի, քանի անգամ գրեցի հրամանոցդ թէ մին Ժ(10) ուստա ուղարկէք, դոյ որ քանը բանացնի, և ձեր հրամանոցէդ մի խպար շարէկ և ամենայն քանի համար քոլն էլ պոլայ»⁶⁴:

Հավանաբար Ղափանում գրեթե նույն պայմաններն են եղել: Ղափանում, ինչպես և Ղարաբաղում, զենքի կարիքը մեծ է եղել, և ապստամբությունը զինվորագրվածներ կային, որ զենք չունեին⁶⁵: Ի վերջո պետք է նկատել, որ հատկապես լեռնաբնակ ժողովրդի մեջ զենքի գործածությունը սովորական երևույթ է եղել: Հայը չէր կարող և չէր ապրում անզեն. ինքնապաշտպանության անհրաժեշտությունը թելադրում էր զենք ունենալ և կարողանալ գործածել: XVІІІ դ. վերջին Հովսեփ էմինը, խոսելով ղարասկզբի հայ ազատագրական

60 «Արարատ», Թ. ԺԴ, էջ 448: Համեմատության համար բերենք նույն դարի սասունցիներին վերաբերող մի վկայություն. «Հեպույի գունդը զինված էր ոչ նվազ թշնամի զորքից, լավ վահաններ, ճապուկ, ճոճուն հեղարեն նիզակներ, պատրույկավոր հրազենք, լահորի ջուհեքտեր թեր, լայնալիճ նետեր, որոց նմուշը ունին տակավին, Տիգրանակերտի դաշույններ, հատու նաճախներ կռում էին սասնյայր: Յուրաքանչյուր մարդ ուներ երկու հրացան, օրիորդներ և մանկտիք լեցնում և կարկառում էին կովոդ սիրականներին» («Մուրճ», 1895, № 1, էջ 113):

61 «Կոռունկ Հայոց աշխարհին», 1863, Բ, էջ 212:

62 Կ. Եղյան, նշվ. աշխ., էջ 386:

63 Տե՛ս նույն տեղում, էջ 445:

64 Նույն տեղում, էջ 426: Կ. Եղյանը անթվակիր այս նամակը մոտավորապես 1725 թ. հուլիսին է գնում:

65 Տե՛ս նույն տեղում, էջ 390:

կոիվների մասին, նշում էր, թե «լեռնաբնակ սև հայերը ազատ էին և իրենց մանկությունն իսկ զենք կր գործածեին»⁶⁶:

Այսպիսով, Ն. Ադոնցի, Ե. Փեշկյանի, Ա. Հովհաննիսյանի, Պ. Հարությունյանի հողավածներում և հետազոտություններում արժարժեք ու լուծվել են Դավիթ բեկի գլխավորած ազատագրական շարժման վերաբերյալ բազմաթիվ կարևոր հարցեր: Մի քանի այլ աշխատություններում, սակայն, բավարար ուշադրություն չի դարձվել մի շարք աղբյուրների ու փաստերի վրա, իսկ մյուս կողմից՝ հաճախ օգտագործվել են այնպիսի նյութեր, որոնց վավերականությունը կասկածելի է: Երբեմն չափից ավելի կասկածամիտ վերաբերմունք է հանդես բերվել Ղուկաս Սեբաստացու «Պատմության» նկատմամբ, որոշ փաստերի կողմնակալ, արհեստական մեկնություններ են տրվել: Ընդունելի չեն մասնավորապես Գուգարաց Հովհաննես իշխանի և Դիզակի Ավան յուզբաշի նույնացումը, մեջլիսների՝ Շահնավազին ուղղված համախոսականը հերյուրանք, կեղծիք համարելը: Դեռևս չլուծված են մնում ազատագրական շարժման հետ կապված մի շարք խնդիրներ, ինչպես՝ Ղափանի ապստամբների հարաբերությունները Վրաստանի ու Արցախի ապստամբների հետ, նրանց վերաբերմունքը և դիրքորոշումը ռուս արքունիքի նկատմամբ և այլն: Վերջապես, եթե ճիշտ են Հ. Երուշինսկու և Մ. Մաղաթ-Թեոփիլյանի հաղորդած տեղեկությունները, ապա Դավիթ բեկը ծնված պիտի լինի 1672 թվականին:

ЗАМЕЧАНИЯ ПО ВОПРОСУ ИСТОРИИ ВОССТАНИЯ ДАВИД БЕКА

А. Г. МАДОЯН

(Р е з ю м е)

Наши представления о восстании в Кафанах начала XVIII в., возглавляемом Давид Беком, опираются главным образом на произведение «История Давид Бека», которую на основе повествования Степаноса Шаумяна, Тер-Аветика и других участников восстания изложил член венещанской конгрегации мхитаристов Гукас Себастиан.

В статье рассматривается научно-историческая и источниковедческая ценность этого произведения, его данные сопоставляются с рядом сведений других источников, касающихся восстания, многие из которых, несомненно, достойны пристального внимания. Такие сведения содержатся в трудах Карапета Шахназаряна, Галуста Шермазяна, Георга Мелкиседекяна-Хубова и др. Показывается, что в исследованиях некоторых историков нашли место явные противоречия и промахи, факты неуместного доверия к некоторым документам (памятная записка Таги Кузанова, свидетельство относительно генеалогии Степаноса Давитова и др.), отрицается отождествление гугарского князя Ованеса с Дизакским Аваном юзбаша. Окончательное выяснение вопросов об ориентации участников кафанского восстания и приобретения ими оружия нуждается в новых фактах. В конце статьи, исходя из сведений, касающихся биографии руководителя восстания Давид Бека, приблизительно определяется год его рождения (1672).

⁶⁶ «Հովսեփի էմինի իր կյանքն ու արկածները». «Հայրենիք», 1926, 13 ապրիլի: